



Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

TAPAK 3

Yangia anidakangma :



Tir Yimyim



tir_yimyim




tir yimyim

TAPAK 6

Bihari nunger teimbakati Nitish
Kumar maneni CM südaktsüner

Mamata -i Teesta metsüingba ya Hydel
Project tem dak tai tongloksü




VOL. XXIII ISSUE NO. 02 (ADOK 02) DIMAPUR YANGTEPNÜ (THURSDAY) MONGPUTENI (OCTOBER) 09, 2025 ₹ 5.00

Tir Yimyim küm 22 jungogo, AoLingo website saya, Yimdangjem otsü zülutepba takokertem metetdaksü



Wb.Marnungtet Ozüküm



Wb.S.Aosüngküm Ozüküm



Wb. Imli P Lemtur



Wb.M.Senthy Jamir



Wb.Temjientenzük



Bendangnüksüng

Dimapur, Oct.08 (TYO) : Tir Yimyim tenzüker küm 22 ajungbamung nung alima nung Ao oshi mesamadaksüi terenlokang renlokdaksütsü aser sapua jembidaksütsü asoshi ‘Artificial Intelligence (AI) powered ajanga ojang dang masü saka orentem dena English nungi Ao-i meyipba website ka tenüng agi AoLingo.in sayaogo.

AoLingo website ya AI Powered ajanga English nungi Ao-i meyipa sentong ka lir, ibai ano merenem, tang tetenzüker dang, anungji nübortem den külem ser arok mapa kümer inyaka aotsü asoshi tanü Tir Yimyim anogomung nung sayar ta Yimozülur K.Temjen Jamiri metetdaksü. “Tang ya AI nem asen oshi angazükdaksüba mapang lir, anungji takokeribo

onok dangi English nungi Ao-i meyipba ojang aser oren yokdaksüner. Tang iba website nung enoka aliba Ao ojang aser orentem aika memetong aser shitak mesüi alitsü, anungji itemji metongshia aotsü,” ta paisa ashi.

“Iba AI machine Learning mapa ya asen chir aser anükapang Bendangnüksüngi inyaker aser Tir Yimyimi yarir. Pa ya Machine Learning Engineer lir aser tang Netherland lima Amsterdam yimti nung alir,” ta Tir Yimyim Yimozüluri metetdaksü. Tanü Wb. Bendangnüksüngi iba sentong nung video ajanga Amsterdam nungi jembia liasü.

Tanü Tir Yimyim küm 22 ajungbamung den repsema iba AoLingo.in website sayatsüba mapang, Business Association of

Nagas (BAN) tir Wb.L.Mongkum Jamir-i Tir Yimyim ajanga nübortem shisatsü renlokdakja tejakleni odaksü atema tenüngsang agütsü aser ano Ao oshi tejakleni renloka odaksütsü atema English nungi Ao oshii meyipba website dena yanglua tenzüka asoshi Wb.Bendangnüksüng aser Tir Yimyim nem tenüngsang agütsü.

Iba kasa sentong nung Ao Senso Telungjem Dimapur tir, Wb. Ningsangwaba Pongeni tajungshi o jembia dang, taoba küm 22 tashi meranga inyaka aruba asoshi Tir Yimyim nem tenüngsang agütsü aser ano tajungba inyaka aotsü asoshi ajungshi. Paisa nübortem nem osangkaket tajung moatsüba asoshi Tsüngrem tenüngsanga metetdaksü.

Ano, iba sentong nung tajung kaji, nüngtugu kentener, Molung Imsongi Yir Yimyim nem mejemtsüba ken tasen tajung ka aten.

Iba kasa sentong nungsa Tir Yimyim aser Bookipedia na longjemer ayongzüka Yimdangjem otsü zülutepba nung takoker osang Bookipedia tenzüksang aser SDO (C) Peren Wb.Sentilong Ozüküm-i metetdaksü.

Iba tetoktepba nung mezüng takok jenjangji Wb.Marnungtet Ozükümi angu aser tanabuba takok jenjangji Wb. Imli P Lemtur aser Wb.S.Aosüngküm Ozüküm nati angu aser tasembuba takok jenjangji Wb.Temjientenzük aser Wb.M.Senthy Jamir nati angu. Iba tetoktepba nung takok kuli kakat den senpet sen Rs.20,000,

Rs.15,000 aser Rs.10,000 liasü. Parnoki züluba otsütemji Shiti (Letter), Memenudang Kidangi Shilangangma, Kita Chir, Medemer Tajung ana aser Kiyimdang Sepbokba Hon Keri Ayok ta liasü. Iba Yimdangjem otsü toktepba nung shilem agir ajak agi nisung 26 liasü aser parnoki züluba otsütem ya kakat küma adoktsü sentong lir ta iba sentong ayongertemisa metetdaksü.

Iba sentong tenzüka Dimapur Ao Baptist Arogo nung Christian Education Director, Wt.R.Asenla Jamiri sarasadem aser tatem küma DABA nung Youth Director, Maongtoshi Longshiri sarasadem. Iba sentong nung menden Tir Yimyim nung Osangzülor Wb.Nüngsangnükshi Jamir liasü. Iba sentong ya BAN Conference hall nung agia liasü.

SEC-i political parties aser maitsü tem metetdaksü

Dimapur, Mongputeni/Oct. 08 (TYO): Nagaland Municipal Act 2023 kübok section 31 (1) nung lateta aliba ama Nagaland State Election Commission-i election symbol (Reservation and Allotment) order 1968 nung ajemdaker, Election Commission of India ajanga mapang shia yanglushiba ama recognised National aser State Parties tenüngtem, Registered Unrecognized Parties aser free symbols list tem tejangja agütsütsü atema yimtenren

party tem principal nung agizütsü teletmetba agiogo, ta sangdong ka ajanga ashi.

Anungji Nagaland Municipal Election Rules 2023 indang Rule 19 of Part-III tashi amshia tsünglanglen agüja aliba National Parties aser State Parties aser parnok maitsü (symbols) den free symbols tem State Election Commission of Nagaland ajanga Pfutsero Town Council indang Ward-11 (Zhipa) nung election agitsü atema agizüker:

NATIONAL PARTIES			
Sl. No	Name of National Parties		Symbol Reserved
1	2		3
1	Aam Aadmi Party (AAP)		Broom
2	Bahujan Samaj Party (BSP)		Elephant
3	Bharatiya Janata Party (BJP)		Lotus
4	Communist Party of India (Marxist) (CPI(M))		Hammer, Sickle and Star
5	Indian National Congress (INC)		Hand
6	National People's Party (NPP)		book
STATE PARTY OF NAGALAND			
Sl. No	Name of the State Party		Symbol Reserved
1	2		3
1	Naga Peoples Front (NPF)		Cock
2	Nationalist Democratic Progressive Party (NDPP)		Globe
3	Lok Janshakti Party (Ram Villas)		Helicopter
4	Nationalist Congress Party (NCP)		clock
REGISTERED UNRECOGNIZED POLITICAL PARTIES			
Sl. No	Name of the Party		Symbol Reserved
1	2		3
1	Nagaland Congress (NC)		Dao
2	Rising People's Party (RPP)		Pen Nip with Several Rays
3	United Naga Democratic Party (UNDP)		Hat
LIST OF FREE SYMBOLS			
Sl. no	List of free symbols	Sl. no	List of free symbols
1	Bat	6	Dish Antenna
2	Battery Torch	7	Road Roller
3	Belt	8	Safety pin
4	Bucket	9	Scissors
10	Spanner		5Diamond

NFHRCC-i Rengmapani section semdang

Dimapur, Mongputeni/Oct. 08 (TYO): Nagaland Foothills Road Coordination Committee (NFHRCC) lenisüba nung Rengma Hoho, Department aser contractor firm temi October 7, 2025 nü Rengmapani nung Foothills Road tang teyangludak

aliba semdanga liasü.

Yangji lenmang shilem kar nung tzünglu kanga sashia aruba ajanga raksatsüba dak alaka lenmang yangluba maparen nung temulung süa liasü, aser contractor firm dang takong mapang tenzüka sülen

yanglushitsü aser December 2025 tashinung renemtsü ayongzüka liasü.

Iba lenmang tesendaktep anasa aliba yimtsüng nung putu menden ajanga tongti shilem agiba atema pela agizüker, ta NFHRCC sangdong ka ajanga ashi.

Mission Karmayogi atema Nagaland sorkari MoU ka zülutep

Dimapur, Mongputeni/Oct. 08 (TYO): Capacity Building Commission, Karmayogi Bharat aser Government of Nagaland tsüngta Memorandum of Understanding (MoU) zülutepba aser Department of Personnel & Administrative Reforms, Government of Nagaland ajanga ayongba Mission Karmayogi indang workshop ka Capital Convention Hall, Kohima nung October 8, 2025 nü agia liasü.

Iba sentong nung Nagaland Chief Secretary, Sentiyanger Imchen, IAS ajanga Capacity Building Commission of India dang pelaba lemsatep, kobai state nung ketdangsürtem asoshi lenla balala nung Mission Karmayogi indang orientations ayongzüka agia liasü.

Nübur tenzüka mapa tajungtiba nung inyaksü asoshi

tarutsü nung temulung lema civil service renema alitsü atema Government of India-i 2020 küm Mission Karmayogi ya tenzüker aser state timba ketdangsür nem training agütsütsü atema Capacity Building Commission den lungjemer inyaker, ta pai ashi.

Department of Personnel and Administrative Reforms aser Administrative Training Institute ajanga sorkar ketdangsür asoshi training sentong tem tenzüker kanga talangkabo masü, koba Nagaland nung sorkar tenzüker atema capacity building atema mera shidak liasü, kechiaser iba yagi ketdangsüba jungdaksür, nübur nem service shidak agütsür aser state lenla ajunga renlokdaksür, ta pai metetdaksü.

Registration aser training modules ya iGOT Karmayogi ta

sür digitalized platform ka ajanga inyaksü, anungji state nung sorkar ketdangsürtem mapang shia pei sempet aser shisatsü rangshitsü ayongzüker, ta Imchen-i ashi.

Ketdangsür aikati linük tesem balala nung training courses agitsü memulunger asünung, iGOT online amala sapang tem amshiba ajanga meta talang nung aliba ketdangsür tema tangazüka jenti alitsü, ta ashi.

Commission Karmayogi atema shidakba takok angutsü atema department aser ketdangsür ajungai temulung agüja shilem agitsü nüngdaker, ta paisa ashi aser iba MoU zülutepba ya Nagaland nung sorkar ketdangsüba tashi itshiba aser capacity building nung mapang talangka tajangzüker akatsü imlar ta shisem.

Tuensang nung DLCC senden menogo



Dimapur, Mongputeni/ October 8 (TYO): Asoba aser asüba züngoksemsü atema District Level Coordination Committee senden October 8 nü Deputy Commissioner & Chairman DLCC Tuensang, Lithrongla Tongpi Rutsa, NCS lenisüba nung Tuensang Deputy Commissioner office nung menogo.

Senden nung committee-i, district nung asoba aser asüba züngoksemsü tajangzük prokshia yoktsü aser Civil Registration system takok ngua benoktsü atema NGO tem aser

village Council Chairmen, Head GBs, Pastors, Head Teacher aser Tribal Union tem amala voluntary lokti tentettem asoshi awareness sentongtem koda ayongzüka agitsü, iba indang sensaksema liasü.

Senden nungsa nisung ka asüba kuli dak sendakba nung Medical Certificate agütsü asoshi Medical staff tem nem training shitak agütsü nungdakba lemsatepa liasü.

Civil Registration System ya online ajanga dang inyaksangshir asünung Rural Registration unit tem nem ajak

ajangzüksü atema online Registrations service tem atema training agütsü.

Maneni Children's Day aser World population Day amala tongtibang anogotem nung tanur arishi küm 2 tekübok alirtem nem angati Birth Certificates agütsü asoshi advertisement tem osang kaket tongtibangtem nung sangdongtsü sensaksema liasü.

Senden nungsa Civil Registration system anep anepa benoktsü atema Shamator aser Noklak district atema Districts Portal balaka amenoktsü asoshi sensaksemogo.

DoIT&C-i Telecommunications Rules 2024 indang metetdaksü

Dimapur, Mongputeni/ October 8 (TYO): Ministry of Communications, Department of Telecommunications, Government of India-i Telecommunications Act 2023 dak ajemdaker Telecommunications (Right of Way) Rules 2024 metetdaksüogo, koba state ajunga nung liromedema benoktsü aser iba ya telecom infrastructure atema Right of Way (RoW) approval inyakyim takaratiba nung benoka inyaksü, digitize aser streamline asütsü nükjiding nung benokog.

Anungji Nagaland nung Telecom Infrastructure amenoktsü atema taoba mapang Right of Way (RoW) agütsüba guidelines

(02.12.2019) aser iba sülen Amendment (30.09.2024) koba Telecommunications Right of Way (RoW) Rules, 2024 den meputepi ali, item ya India sorkari sangdongba tesüsabuba Rules den putepa inyaksangshitsü asoshi magi akümtsü.

Department aser stakeholder tem ajaki iba sülen tashi anga anidaksü aser telecommunication infrastructure atema Right of Way (RoW) application tem ya atakzükja aliba digital sabang ajanga dang benoktsü, ta metetdaksüogo.

DGC nung Oct 8 nü workshop ka agiogo



Dimapur, Mongputeni/ October 8 (TYO): PM-USHA Monitoring Cell, Dimapur Government College-i ayongzüka October 8 nü "Preservation of Fruits and Vegetables" dak sendakba nung anogo ka asoshi workshop ka College Auditorium nung agiogo.

Iba sentong ya PM-USHA inyakyim kübok Ministry of Education-i senotsü teyari agüja ayongzüka mungogo, koba higher education vocationalisation ajungkettsü nükjiding nung ayongzüka lir.

Workshop nung Hayo Foods, Burma Camp, Dimapur Proprietor Orenponi Humtsoe shisalen sayur liasü.

Sentong nung Humtsoe-i,

chiyongtsü wazüka ayutsü atema tetsü tebou mapang nungi benshia aruba aser aser tawa tanü inyakyim balala indang tangazükba agütsü. Lai, lalushibong masütsü atema, sustainability ajungkettsü aser entrepreneurship atema maongka lapoktsütsü asoshi chiyongtsü wazüka ayutsü koda tongtibang iba indang lemsatep.

Sentong nung shilem agirtem dehydration, pickling, aser jam yangluba amala tasatem aser süngjalijang aser aonsotsütem talangba yua chitettsü atema scientific principles tem angazüka liasü.

Sensaksem agiba mapang kaketshirtem aser faculty temi parnoki mejangjai aliba onüktem jangjashi aser local preservation

inyakyimtem lemsatepa liasü. Iba workshop ajanga sentong nung shilem agirtem chiyongtsü processing nung shilem agitsü ajungmesogo.

Sentong ya Skill Development Committee, IQAC, ICT Committee, PM-USHA Monitoring Cell, aser Event Management Committee of Dimapur Government College nati nongita yariogo.

Iba workshop ajanga chiyongtsü wazüka ayutsü atema tasa balala indang tangazükba aser shisatsü agütsüogo aser sentong nung shilem agirtem jurila aser mapa naprongla nung chiyongtsü wazüka ayutsü atema inyakyim tajung benoka inyaksangshitsü ajungmesogo.

Dimapur nung mejangjaba tasü mang ka nguteta lir

Dimapur, Mongputeni/ October 8 (TYO): October 8 nü Station Manager, NF Railway Dimapur nungi nisung ka platform No.1 tatembang len FOB LMG anasa tasü ama mepidaka aliba osang tezüluba nung agizüka liasü.

Osang agizükba sülen duty party iba tesemi ilonga ao aser mejangjaba non-local tebur (arishi küm 40 shi) ka footbridge togu nung sür aliba nguteta liasü. Temzüng ozüng kübok tinyaktsü maparen ajak tembanga inyakba sülen tasü mang ya PM examination

aser identification atema District Hospital Morgue-i benerogo.

Asüsang yagi half pant tanak, T-shirt tanak, slipper temerem semer liasü. Pa teprangtsü tanak aser teku nung nepluscü ka lir. Pa aso süklep 5 sür inch 4 lir.

Ken o dak sendakba nung asüsanger kinunger adianu aser medemertem dang Officer-in-Charge, Govt. Railway Police Station, Dimapur. (Mobile No. 7085055021) den tongteprateptsü mepeshia metetdaksüogo.

East Dimapur Town Council-i metetdaksü

Dimapur, Mongputeni/ October 8 (TYO): East Dimapur Town Council kübok aliba business establishment, dokan kibur aser shishilembartem dang GST dak sendaka aliba osettem ajak yanglushir aliba GST jenjang nung dang ayoktsüla ta metetdaksüogo.

Inyakyim sülen maidakba, sen tali meshiba mesüra GST jenjang tasenba sülen

manidakba ya sorkari jenjang atakzüksü aliba nung aibelen ka ama züngshitsü. Aibelenertem anema jenjang tapet agitsü, ta kasa sangdong ajanga metetdaksü.

Tashishitsü kar dang lira mesüra oset nung jenjang tali meshiba ngutetra Rate Control & Quality Maintenance den iba number: 9863640294 ajanga tongteprateptsü metetdaksüogo.



Peren kübok Inbung yimsü nung tainlonglong aiür chanutem atema district level anemia screening aser awareness sentong agiba mapang District programme Officer, I. Tsungrosangla Ao-i ashiba agi, Department of Health & Family Welfare den longjemer Social Welfare Department-i Anemia Screening aser awareness sentong ya ayongzüka agir ta ashi.

DYRS-i VBLYDnung shilemagitsü lanurtem jaoker

Dimapur, Mongputeni/ October 8 (TYO): Department of Youth Resources and Sports, Government of Nagaland-i, state nung aliba lanurtem Viksit Bharat Young Leaders Dialogue (VBLYD) 2025 nung shilem agitsü jaokogo. Iba sentong ya Ministry of Youth Affairs and Sports, Government of India-i tenzükba sentong ka lir.

Iba Dialogue ya, 2047 küm tashi nungbo India ya developed linük ka kümdaktsütsü nükjiding aliba ataloktsütsü atema arishi küm 15 nungi 29 tsüngda aliba lanur lenirtem nem parnok tebilemba aser nuklatem lemsateptsü asoshi agütsüba national sabang ka lir.

Iba sentong ya shilem asem küma lemsar agitsü.

Mezüngbuba nung Viksit Bharat Quiz: Iba ya linük nükjiding, lanurtem terenlok aser 2047 atema India nukla indang koba tashi angateta ali aji asadangtsü atema linük

ajunga nung online quiz ka lir. Tanabuba nung Otsünü (essay) zülutepba: Quiz asayaba sülen shimertemi onük dak ajemdaker otsünü zülua benoktsü.

Tasembuba nung nukla lemsatepba: Final atongertemi state jenjang nung parnok tebilembatem renema lemsateptsü aser iba nungi shimtetertem state tenüng nung National Dialogue, New Delhi nung shilem agitsü.

Lanur arishi küm 15 nungi 29 tsüngda alirtemi iba tetoktepba nung shilem agitettsü. Tetoktepba nung shilem agitsü aser züngoksemsü atema osang tejangja MY Bharat (Mera Yuva Bharat) platform at <https://mybharat.gov.in> nung angutsü.

Lanur shirnoki iba tetoktepba nung shilem agitsü janrar parnok dang yakyaka shilem agia iba sentong nung Nagaland ola akümtsü ayongzüko.



New Delhi, October 08, 2025: Bodhbarnü 93buba Indian Air Force Day anogomong nung National War Memorial nung Chief of Defence Staff (CDS), General Anil Chauhan, Chief of Army Staff (COAS) General Upendra Dwivedi, Chief of Naval Staff (CNS) Admiral Dinesh K. Tripathi aser Chief of Air Staff (CAF) Air Chief Marshal A. P. Singh nungeri rara nung asürtem nem akhüm agütsüba sülen tangokba noksa nung angur.

Bihari nunger teimbakati Nitish Kumar maneni CM südaktsüner

New Delhi, October 08 (Agencies): Election Commission-i November 6 aser November 11 anogotem nung Bihar nung assembly election agitsü sangdongba sülen IANS?Matrize-i mezüng iba election atema survey ka agiogo.

Iba survey ajanga, NDA-i vote shilem 49 angutsü aser Mahagathbandhan teloktepi vote shilem 36 angutsü ta bushitetogo.

IANS-Matrize News Communications poll, "Opinion Poll Report @ Bihar" ajanga NDA-i vote shilem 49 angutsü aser assembly menden 150 nungi 160 tashi angutsü ta bushitet.

Bihar nung assembly menden 243 lir. Iba poll nung shilem agir shilem 57-ibo Ato

kilonser Narendra Modi tenüng tajung ajanga iba election nung tongti shilem ka agitsü, ta ashi.

Iba poll nung shilem agir shilem 35-i, yimsüsütsü atema party tajungtibaji BJP lir ta ashi, shilem 18-i yimsüsütsü atema party tajungtibaji JD(U) lir ta ashi, shilem 13-i R JD, shilem 8-i Jan Suraaj aser shilem 2-i dang yimsüsütsü atema party tajungtibaji Congress lir ta ashi.

Iba poll nung shilem agir shilem 42-i Nitish Kumar (JD-U) maneni Chief Minister südaktsüner, shilem 15-i Tejashwi Yadav (RJD) CM südaktsüner, shilem-i Prashant Kishor (Jan Suraaj Party) CM südaktsüner aser shilem 8-i Chirag Paswan (LJP-Ram Vilas) CM südaktsüner.

Shilem 3-i Samrat Choudhary (BJP) CM

südaktsüner aser shilem kati Giriraj Singh (BJP) aser shilem kati Upendra Kushwaha (JD-U) CM südaktsüner.

IANS-Matrize Opinion poll ajangasa, BJP-i vote shilem 21 angutsü, RJD-i vote shilem 21, Congress-i shilem 8, JD(U)-i shilem 18, LJP (Chirag Paswan)-i shilem 6, Jan Suraj Party-i shilem 7, tangartem (BSP, JMM, Independents)-i vote shilem 7 angutsü ta asadangtet.

2020 küm Bihar assembly election nung BJP-JDU teloktepi RJD-i aniba Mahagathbandhan teloktep madak takok ngua liasü.

BJP-JDU teloktepi menden 125 nung takok angu, RJD-i menden 75, Congress-i menden 19 aser tangartemi menden 16 nung takok ngua liasü.

Andhra Pradesh nung firecrackers unit ka nung nisung trok asü

New Delhi, October 08 (Agencies): Andhra Pradesh kübok Konaseema district nung aliba firecrackers yangluba unit ka arongba lendong nung nisung trok asü aser ana yiruogo.

Bodhbar nikongdang 1:00 ako meta Sri Ganapati Grand Fire Works unit nung inyakertemi mapa meshidaki

inyakba ajanga iba lendong atalok südi ta bilemer.

Konaseema district superintendent of police, Rahul Meena-i, "Iba unit ket nung license tejangja lir. Iba lendong nung asürtem tasü mang trok nguogo," ta metetdaksü.

Ramachandrapuram sub-divisional police officer B. Raghuvver-i ashiba agi,

"Tesüiba hopta ana tashi Revenue Department nungi ketdangsertemi iba unit nem tekümdangtsü osang metetdakja liasü," ta metetdaksü.

Sri Ganapati Grand Fire Works unit ya 1932 küm lapoka liasü aser iba unit ya region nung firecrackers unit tejentibatem rongnung ka lir.



Mumbai, October 08, 2025: Bodhbarnü United Kingdom Ato kilonser, Keir Starmer Mumbai nung aliba Chhatrapati Shivaji Maharaj International Airport tonga aruba mapang Maharashtra Angh, Acharya Devvrat aser Maharashtra Chief Minister Devendra Fadnavis nati pa agizükba noksa nung angur.

India nung tzüngluruwa mongpu October 11 tashi nung anenadoktsü

Pune, October 08 (Agencies): India Meteorological Department (IMD)-i, taruba anogo asem-pezü tsüngda linük nung tzüngluruwa mongpu anenadoktsü, ta metetdaksü.

Gujarat, Madhya Pradesh, Uttar Pradesh aser Maharashtra nung tzünglu aruba anena linük nung tzüngluruwa mongpu anentsü. Teti agia October 5 nungi tenzüka Maharashtra nung iba mongpu anenadoker, ajisüaka takümbo anogo ishka menor.

IMD nungi ketdangser kati, Maharashtra nung iba mongpu anenba tenzüka kobi melii Mumbai aser Pune na nung tembangtsü, ta metetdaksü.

Takümbo tzüngluruwa mongpu menoa metembangba ya Bay of Bengal nung tsüngsang-mopung ajanga lir, aser iba ya talisa Gujarat anasa

Cyclone Shakti ajanga lir. Ano Bay of Bengal nunga yipru ka tenteta Bihar tsütsüleni aoba ajanga tzünglu ano maneni arua liasü.

Meteorologist, Anupam Kashyapi-i, October 11 tashi nungbo Mumbai aser Pune na densema Maharashtra tesem tulubaka nung tzüngluruwa mongpu anentsü, ta metetdaksü.

Taoba mapang IMD climate research nung tongti, KS Hosalikar-i, aiben Arabian Sea mesüra Bay of Bengal nung yipru ajanga tzüngluruwa mongpu menoa anener, ta metetdaksü.

India nung tzüngluruwa mongpu tama tenzüka state ji Kerala lir; tzüngluruwa mongpu ya teti agia June 1 anogo nung tenzüker, ajisüaka takümbo anogo 8 jelia May 24 nü Kerala nung iba mongpu tenzüka liasü.

Telangana nung DCA-i aket mozü ana majemtsü sangdonger

Hyderabad, Mongputeni/October 08 (Agencies): Bodhbarnü Telangana nung Drugs Control Administration-i nüburtem dang aket mozü ana majemtsü metetdaksüogo; aket mozü ana nungji miim keta aliba putetogo, ta osang angazüker.

Madhya Pradesh nung aliba Drug Testing Laboratory nung aket mozü ana nungji Diethylene Glycol (DEG) keta aliba osang Telangana administration nem metetdaksü.

Madhya Pradesh state sorkar indang laboratory nung item mozü tendangba osang nungji ajemdaker nüburtem dang aket mozü anapronglaji majemtsü metetdaksür, aser nüburtem ket nung aket mozü anaji lira tekeraba nung Drugs Control Authority nem metetdakjang, ta Telangana Drugs Control Administration-i metetdaksü.

Aket mozü ana- 'Relife' (Batch No.: LSL25160) aser 'Respiresh TR' (Batch No.: R01GL2523) napronglaji Gujarat nung aliba pharma company temi yangluba lir, ta sangdong nung shia lir.

Madhya Pradesh aser Rajasthan na nung tanur aika asüba nung ajemdaker October 4 nü administration-i nüburtem dang 'Coldrif' aket mozü majemtsü metetdakja liasü.

Ano külen tanga osang ka nung, Madhya Pradesh aser Rajasthan na nung opposition lenirtemi, state ana nungji aket mozü dak sendakba timtem balala liaka BJP sorkartemi kecha meinyaker, ta aitsü.

Mongolbarnü party headquarters nung osangbenertem den jembidang Congress lenir anati, Madhya Pradesh aser Rajasthan na nung tatalokbatemji judicial ajanga bushisüngdang nungang

ochi metettsü, ta metetdaksü.

Rajasthan nung Opposition lenir, Tika Ram Jolly-i, "Madhya Pradesh nung nisung aika süogo. Nisung 17 shi süadokogo aser Rajasthan nunga nisung pezü süogo aser tanur aika kanga mejungi shirangdar. Tanurtem rongnung kabo chief minister (Bhajan Lal Sharma) indang district Bharatpur nungi lir. Aket mozü ajemba sülen tanurtem asübaji state sorkari magizüktet aser ibaji tai, ta kuli sayutsü atema hospital nung doctor ka aser ambulance driver anati iba mozüji jema sayu. Par asempronglaji ghonda 8 sülen ang shia aru," ta metetdaksü.

Jully-isa, "September ita tatembanglen state ana nungji tanurtem asüba sülen parnoki mozü (Coldrif) nungji miim keta alitsüa akok mesüra majung asütsüa akok ta ashi, ajisüaka maneni iba mozüji ayok. Madhya Pradesh nungi iba osang angazükba sülen Tamil Nadu sorkaribo item mozü nokdanga liasü. Ajisüaka Madhya Pradesh nungbo tanur 9 asüba sülen ang nokdang. Rajasthan nung health minister dang aket mozü indangji asüngdangba mapang nung pai, parnoki bushisüngdangdar aser aket mozü nungji timtem kecha mali ta ashiba sülen osangbenertem senden nungi ayazüka oadok," ta metetdaksü.

Madhya Pradesh nung Opposition lenir Umang Singhar-i, "Sensaker kibongtemi tesüiba ita ka tsüngda Nagpur nung aliba hospital tem nung sen lakh 10 nungi 15 tashi indokogo. Iba tatalokba ya tangsa judicial ajanga bushisüngdangtsüla. Item kibongtem sentsüh aotsü atema parnok nem senotsü temenok agütsütsüla," ta takhangba agütsü.



TIR YIMYIM YIMOBILEM (EDITRIAL)

DIMAPUR THURSDAY, OCTOBER (MONGPUTENI) 09, 2025

AoLingo ya kechi ?

Lingo tetezü oshi aser oshisa rongnunga computer oshi, anungji AoLingo tetezü asenoki angatettsü agi Ao oshi aser Ao oshisa asüyonga Computer ajanga angazükba oshi ta jet ta Aortemi dang masü saka tangar bendangertemia angatettsü. Aji oda, tanübo asenok tia ajung , asenok Ao oshia Artificial Intelligence (AI) ajanga English nungi meyipzüka ashitsüsa nüboa aser mapang tajunga moatsüogo. Ya asoshi Tsüngrem tenüng sangdi aser iba ama AI Machine Learning mapa ajanga Ao oshi alima sünga jembitsüsa inyaktetba tashitemeteter aser computer nung mongin lenir, Bendangnüksüng dang peladi. Pa ya asenok asoshi moatsüba jabaso aser lenir tajung ka lir. Tanü digital putu nung Ao oshi digital nung angazükba inyaktüsü lenmang lapoktsüba ya Tsüngremi Ao kin nem , ano, maongka tulu tajung ka agütsüogo ya angateter. Aji oda, asenok taoba putu nung aliba mapang, putu tasenbajibo computer putu asütsü ta jembia aru aser asangsang nung tanü asenok computer putu nung Artificial Intelligence (AI) teyari agi mapa ajak inyak tenzükogo. Iba putu mapangji meteta asenokia AI ajanga kechi inyaker aser AI ajanga asen nüngdakbatem koma inyaktüsü ta meteta manidakra, computer aser smart phone amshi kisüng ashiba agibo tangar memeneptsü. Ano, tanü putu nung lanurtemi kaket mazünger, anungji asen tetsü oshi renlokdahtsütsü asoshi kaketsa kaket zülüaka aser ocep tajung abensaa adokaka, lanurtemi sapua mazüngtsü, anungji parnok amongdak 'digital platform ' bushia aotsü nüngdaker, kechiyong parnok jakzükba kin mesamatsü asoshi parnoki parnok tetsü oshi mamadoki angazüktsüla aser jembitsüla. Iba nükjiong nung, talisa, 1997 küm nungi 2024 tashi nung asor lanur aser tanurtem ,shirnok dang Gen Z aser Generation Alpha ta ajar, parnok nem parnok tetsü oshi angazüka jembidaktsütsü asoshi, par putu den apet kaketreju ka lapoktsü ama, AoLingo website ya lapoktsür. Atangji, item lanur aser tanurtemi pei tetsü oshi mejembiner aser sempar ta masü saka par tsüraburtemi parnokji pei oshi aser sobaliba meteta aientsüsa manitet, anungji ibaji angateta parnok aija aser menütsüa masü saka Ao kin mesamatsü mechi nung parnok dang pei tetsü oshi sayutsüba kanga rongdak nüngdak ka kümogo. Tanü asenok asoshi AoLingo website sayatsüba ya mapa ajak jungjunga renemba agi sayar masü saka asen nübortem nem metetdakja külem arok mapa ser inyaktüsü nüngdakba agi yimkong nem metetdakja sayaogo, anungji joko asenok ajak külem ser iba mapa nung yariteptsü tenzüker ta bilemdi. Aji oda, tang ya AI nem asen oshi angazükdahtsüba mapang lir, anungji takokeribo onok dangi English nungi Aoi meyipba ojang aser orentem yokra, iba jagi asen oshi digital sabang nung alima ajaklen ajaki angazüktsütsüsa renemtettsü. Asenoki Ao oshi ya ilaa mebilemli, kechiyong alima nung Ao oshi ya kanga tongtibang aser nüngtugu oshi ka lir. Alima tesem kongi odir oaka, Ao kin memetetbabo malitsü. Ajisüaka, tangari Ao kin meteter asenoki Ao oshi meshira, alima nung asenok mashimalu aser tamakokji tuluka asütsü. Aji oda, tang AoLingo website nung enoka aliba Ao ojang aser orentem rongnungjia aika meshitak lir, anungji itemji metongshia anidaktsü. Iba tangatetba nung asenok ajaki tanü nungi AI nem asen oshi anogo shia agütsüpet agüja angazükdahtsüsa, sangküm küm iba kasa anogo tashi nungbo AI ajanga asenoki nüngdakba English kaket nungi ajunga Ao oshi nunga meyipzüktsütettsü. Ibaji tesüngmangtsüka saka takoktsü, kechiyong tanü limaji iba limaji lir. Aji oda, joko asenok zülumen, spelling, nung ashishitepa tejakleni moi kazüba mapang masü saka aseni jembitsüba onük tashi AI nem renemdahtsüba putu lir. Aji oda, tanübo asen oshi meyipba nunga tetezü aser züluba nunga zülumen aser olasü adokba nunga AI-i dang ashitsü. Joko, alima nung AI tashi mamshirtembo matamabensartem amai kümadokogo. Iba amaji shisatsü aser temetetba renlokba nung alima kanga ariteper, anungji asenoka ashishitepa mekazüi, tangar ajateta aotsü mekokaka, temenepbo menepa aotsüsa ariteptsüla .

OLEMSABANG

TIA MAKa

~ Rev. Imly Jamir

(Iba ya DABA Tongtepratep Adok 156, January - July 2024 nung adokba ocet tazüngertem ajangzükdahtsütsü bilema adoktsür).

(Yashi adok nungi...)

Tena ya kinungtsü aser kinungbo par kibong mesütsü atema aliba Auto ka aliba samadoker iba atema sarasadem ka aginüa aruba saka tia maka tena yaki kecha sempeta mebeni dang aruba liasü. Anungji Tsüngrem nisung jagi kidangi atutsüa memela aser sarasademtsüa mapang malia tanepbo odang oang ta shiyaa liasü. Anungji, ni tena problem-ji asüngdang arung ni sarasademtsüdi ta sür par kima nungji sarasademmer yok. Yamaji sür ni iba adianu kidangi tua mener otsü jembia aodang parji yamaji dang maka mait nungji atemer awashi kecha memetet taküm piyong alirji iba ama mapang nungji angatetdahtsüdi ta sür meyipa yoker asüa ta ashi. Tetezü sempet kecha mebeni dang aruba agi meyipa yoka ta ashiba liasü.

Iba adianu taküm aser kibongji kanga dang tepetzük tia nungi Tsüngremi ajungketba taküm ka liasü. Lia lia kodang taküm jenjang tajung aküm tanem tanemi Tsüngrem jenjang jagi pai atu aser Tsüngrem jenjang nungji alitsü tenzük dang Tsüngremi pa dang meshii pa toktsür oadok. Kodang Tsüngrem pa nungi pilaadok par chiyongtsü mapanga mengui nisungtem anungba to tanem tanemi anenadok aser lia liabo par kiji azüngmeyakdak ki ka kümadok. Aji dang masü, lia liabo pa temang nunga timtem tulu kati menepadok iba timtemji aonung anüngdang kodanga amoa aotsü mekoki aküm (anünüa maküm). Ano tatsüka dang lirbo tenarongi kecha mangashi aser o jembitsü mekoki aküm. Item timtemji bener alidang ken ni pa den mapang tsüka endoktsü asoshi ao. Pa den mener zülü ajanga dang pa den jembitsü koka liasü. Pa den mener otsü metenzük dang pa kanga ajep anungji ni pa dang kechiba ajeper ta asüngdang, idangji pai ni Tsüngremi sendokogo ta action ajanga ashi aser pai paper ka nung yamai zülur agütsü ni tanaben temulung meyiptsü makok kümogo kechiyong kü mulungjang nung tejembi ba tila ka danga malia.

Nai mapang endoka aika shiaka kü mulungjang lapoktsü temela masüa ta ashi. Ni temulung meyipner, molumii moner, ni aiben sarasadem asür saka temulungjang nung tarongba tila ka danga mali kümogo sarasademjang ta ashi. Pa den mapang tsüka mena sarasademmer ni kidangi aru. Hopta ka shi lir ni tanaben pa dangi ao saka iba mapang nungjibo tashi ajak lulaa kümer pai tenük agi ranglokba dak alaka teka tetsüng arakzütsü makoki kümer liasü. Iba mapang nungjia pa tenük nungi nüktzü alua temulung rasa ajep. Iba sülenjibo paji anogo pezünü dang lir iba adianu temulung meyipnüseta Tsüngrem majurui iba lima taküm tembangadok. Koda tesusatsü pa temulung meyiptsü mapang tajung süiadoker liasü. TIA MAKa.

Temeimbatem, mapang ajak ya asenok meyong dangbo masü taküm piyong Tsüngrem tenzüka arur tanaben pei lenmangi meyipa oadokbapur jenti amangba pur rongnung tena lir. Itempur rongnung Saulchuba ama aser tamalen shisemba adianu amaji lia lia Tsüngrem nungdaka Tsüngrem bushia meyipa arudang Tsüngremi toktsür oadoker aliba amaji asenokia ajurutsü menua mali. TIA MAKaBa taküm masütsü merangdi. Tsüngremi moajangma.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Africa nung pastor 200,000 nem training agütsütsü: Rev. Nelson Makanda



Rev. Nelson Makanda

October 08, 2025: Tawa Rev. Nelson Makanda-i Africa nem United States President's Emergency Plan for AIDS Relief (PEPFAR) nungi senotsü teyari agüjang, ta mepishiogo.

2003 küm taoba mapang US Tir, George W. Bush-i PEPFAR tenzükba mapang nungi U.S. Department of State's Office of U.S. Global AIDS Coordinator & Health Diplomacy-iba fund ketdangsüa liasü. Iba program kübok alima nung HIV/AIDS tebilemtsü koktettsü atema dollar sen billion 100 dak tali indokogo.

US Secretary of State, Marco Rubio-i, U.S. Agency for International Development (USAID) indang program aika March ita nungi anenadoktsü, ta sangdongba mapang nung taoba mapang pastor aser tang Africa International University, Nairobi nung Vice-Chancellor, Rev. Makanda-i, iba ya tejashitsü osang ka lir, ta metetdakja liasü.

Makanda-i, "Iba fund anenadokba ajanga lanurtem, tanurtem, tainlonglongpurtem aser tetsütem aikati medical teyari magiteter. Ibayongji onoki PEPFAR dang senotsü teyari agüjang ta mepishir," ta

metetdaksü.

Makanda-i tesüiba küm aika Kenya aser Africa tesem balala nung nüburtem tenzükba den külemi Khrista osangtajung lemsatapa arudar.

Tamalen Makanda ya Nairobi Baptist Church nung pastor inyaka liasü aser Kenya National Council of Churches nunga deputy general secretary inyaka liasü. Kenya National Council of Churches nung Protestant denomination 30 dak tali lir aser züngsem million 30 dak tali lir. Makanda ya Evangelical Alliance of Kenya nunga Secretary inyakogo. Iba Alliance nung züngsem million 12-15 shi lir.

1900 küm Africa nung nütsüng shilem 1.7 dang Evangelical Khristantem liasü, ajisüaka 2020 küm tashi nungbo nütsüng shilem 42 Evangelical Khristantem lir. Yamai dang ora 2050 küm tashi nungbo alima nung Evangelical nütsüng shilem 50 dak talibo Africa nungi asütsü.

Rev. Makanda-i, "Evangelical sayutsüngirtem ajanga sensakertem aser timtemertem nem teimla agütsür, aser ibaji ajanga evangelical nütsüng

arener," ta metetdaksü.

"Nüburtemi Africa nung akhi sobaliba yimsü toktsür Khristan yimsü agizüker aser taküm libaliro tajungba akümer. Ajisüaka tang tashi Africa nung shirangertem jenti lir, sensak tia lir, azüng-zülu mashirtem jenti lir aser taküm nung timtem balala ajangshir. Evangelical sayutsüngirtem ajanga nüburtem nem teimla tulu agütsür," ta pai metetdaksü.

Africa nung nütsüng shilem tesadangbo arrshi küm 19 ser tekübokpurtem lir, anungji iba continent nung lanurtem jenti moatsüba ajanga Evangelicals ano tali renloktsü, ta pai ashi.

"Taruba küm 10-15 tsüngda ano million 400 nungi million 450 tsüngda bendenloktsü. Iba ya nütsüng arenba den külemi rongsenkettzüng, yimtenren aser America nunger missionary tem ajanga lir," ta Makanda-i ashi.

"Iba ama Khristan nütsüng tali renlokba ajanga training agiba pastor tem aika nüngdaka akümer, ajisüaka pastor tem peria mali. Ibayongji Africa International University (AIU)-i taruba küm pongu tsüngda Africa nung pastor 200,000 nem training agütsütsü atema Church Transformation Network den longjemer inyaker. CTN ya California nung amenoka aliba melungtet telok ka lir. Parnoki asalentong yangluba lenirtem aser pastor tem nem training agütsür," ta pai metetdaksü.

Osang angazükba agi, alima nung pastor tem shilem 95 bo formal training magirtem lir, aser Africa nunga training magiba pastor tem jenti lir.

ANO GO ABEN TSÜNGREM DEN

Nai kong repranger?

Peteri tejak meyipa, nütsüng shiba Yisui meim aser ano shibai aonung chiyongdang Yisu teku nung metaloker... Kibuba, aser iba nisungi kechi asütsü? Yohan 21:20-21.

Tsüngremi ne den jembir külen mezüngbuba nai inyaksüba lendong lir. Yisui Peter dang pai kechi mapa inyak aser koba tasü agi pa asütsü iba indang ashi (t.18-19). Peter taküm nung ibai temeshi mapang ka liasü. Pa kiburi pa dang tarutsü taküm indang ashi. Pa takümji jangratemtsü taküm ka masütsü saka pa Kibur aser Masteri shimtetba aser moatsüba taküm.

Yisui pa dang ashiba langzütsü melena pai pa meketa alirtem reprang. Pai Yohan ngushi, shiba dang Yisui meim. "Saka Kibuba, iba nisung koda?" Peteri asüngdang. Peter dang pa kechi tasüba agi asütsü iba indang Yisui pa dang shir liasü. Pa mapa tangar den medemdangtsüji koda yimya liasü! Tsüngrem tenzükertem asoshi ibai tatitangba tulu liasü. Tsüngremi kü tembar nem ki tuluba agütsü asü? Tsüngremi kü tembar temeimba anebtsü saka nibo manebtsü? Tsüngremi tembar dang junger nung dang yutsür asü? Tsüngremi tembartembo kibong anasa alitsü mela saka nibo talangka yok ?

Yisui Peter aser Yohan lenmang balala nung jajatsü mela. Yisui Pa tenzükeri pei tenük pa master dak masü tangar dak ranglokbaji koda lendong aji metetta liasü. Nai kong rangloker? Nai Tsüngremi ne den sendaktepa aliba nungi tangar dang inyakba tali bilemer asü?

Taküm America nung Tenla ki 15,000 dak tali shibangadoktsü

October 08, 2025: Taküm küm tatembanglen tashi nung United States nung Tenla ki 15,000 dak tali shibangadoktsü, aser ibaji ajanga yimtsüngtem aser kanga tezülen aliba tesemtem nung sensakertemi chiyungtsü densema teyari balala mangutsü, ta Pew Research Center indang report tasen ka ajanga metetdaksü.

Tenla ki aika shibangba tongti kuliji America nunger aikati Khristan yimsü toktsüba agi lir, ta parnokisa metetdaksü. 2007 küm America nunger nütsüng shilem 78 bo Khristantem liasü, ajisüaka tangbo America nunger nütsüng shilem 62 dang Khristantem lir.

Ajioda süaka denomination telemsa kecha maliba Arogo tulu aika nung züngsem kanga arener aser Evangelical Khristantema kanga arener.

Taküm küm tatembanglen tashi nung America nung Tenla ki 15,000 dak tali shibangtsü ta asadangtetba ya ajanga US nung timtem tulu aliba sayur, ta telok karibo metetdaksüogo.

National Council of Churches-i, tarutsü nung US nung Tenla ki 100,000 shi shibangtsü, aser ibaji ajanga pastor 15,000-i part-time ministry dang inyaksüsa akümtsü, ta metetdaksü.

Pastor kibongtemi timtem kanga ajangshitsü, aser ibaji ajanga parnoki kibong mesütsü atema tanga mapa-a inyaksüsa akümtsü, ta National Council of Churches-isa metetdaksü.

US nung toklang tenzüker pastor tem aika itasenji küm ka nung dollar sen 56,000 shi dang lir. US nung pastor tem shilem 10-i dang itasen küm ka nung dollar sen 94,001 nungi 153,000 tsüngda angur.

Intl' Christian Concern Tir menden atema Shawn Wright shimogo



October 08, 2025: International Christian Concern (ICC) Tir menden atema Shawn Wright shimogo; pai tang Tir teinyakdak Jeff King melenzütsü.

Shawn Wright ya küm aika international ministry nung tenzüka arur. Jeff King-i küm 20 dak tali ICC nung Tir inyaka aruba sülen iba menden nungi anisüngzüksü, iba sülen October 31 nü Wright-i office mapa agizüksü.

ICC board-i, tang alima tesem aika nung Khristantem ano taliba reshikangshiba tensa mapang ka nung Tir menden melenteptsü, ta metetdaksü.

ICC ya 1995 küm tenteta

liasü, aser iba mapang nungjagi iba organization-i linük 40 dak tema nung reshikangshi ajangshiba Khristantem nem teyari agütsüba den külemi awareness programs ayongzüka katsür.

"ICC otsü nung Tir tasembuba, Shawn-ia maneni reshikangshi ajangshiba Khristantem nungita yaritsü. Reshikangshi nokdangtsü atema pa dak mangdang tajung aliba ajanga onok melung asür," ta ICC Board chairman, Ed Wormald-i sangdong ka ajanga metetdaksü.

Shawn Wright ya tamalen Khristan media ministry PAK7 US nung Tir inyaka liasü. PAK7

US telok yagi Pakistan nung lanur Khristantem nungita yarir.

Pa Elam Ministries nunga East regional director inyaka liasü. Iba telok yagi Iran nung Khristantem yarir. Pa melungtet telok Growing Leaders nunga inyakogo.

Shawn ya tamalen US Air Force nung liasü. Pai University of Maryland Global Campus nungi

Management studies aser business administration nung degree ngua liasü.

2002 küm nungi Jeff King-i ICC Tir inyaka arur. Tang ICC nung staff 50 dak tali lir.

Jeff King-i, "ICC lenitsü atema maongka anguba ya akümüli nung akhümket maongka lir. ICC indang mission ji nisung ka atema masü saka pei aianu aser adianutem ola madoki timtemba anema ola adoka inyaksü asoshi melungtetba Khristantem indang mapatong ka lir," ta metetdaksü.

1995 küm Christian Solidarity International nungi ICC tenteta liasü, aser iba mapang nungjagi tenzüka ICC-i alima tesem ajaklen reshikangshiba Khristantem nungita yarir.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Tipatem

(adj) süngjema aküm, anisüngzük (settle down, calm down)

* Kanga tatsük mapang tzünglu aruba agi nisungtem tipatem.

Tiptesüing

(adj) tipdema, jungjunga ayuba (orderly)

* Tiptesüing mesütetba agi ki kanga janar.

OLONG PAITEP # 7294

1			2			3			4	
			5		6		7			
8										
			9							
	10									
								11		12
			13				14			
15						16				

TIPIEN

1. Anenzükdak ki
3. Asür mangyimba
5. Temulung nung shisadang
8. T ___ lu
10. Takdang temalen
11. Tesa ___ a
13. Ajungbena temulungjang
- tongtonglatsü atu
15. Tejen lai nung tesayur
16. Tsüingsak-mopung

-

(5)

-

(5)

-

(5)

-

(3)

-

(9)

-

(3)

-

(5)

-

(5)

LANGTSÜNGLEN

1. Reprangdaksü
2. ___ ur
4. Kiojen yangludak
6. _____ ait
7. Nagaland nung ayong ka
9. Küm kasa purtem
10. Tetsüing tajemtdak
12. ___ adenshi
14. Tsünüsenbongtsü adokdak

-

(4)

-

(3)

-

(6)

-

(7)

-

(5)

-

(5)

-

(6)

-

(4)

-

(3)

OLONG PAITEP # 7293 TELANGZÜBA**TIPIEN :**

1. Kasa, 6. Rangben, 7. Mait,
9. Poktet, 11. Ati, 13. Atasa, 16. Rür,
17. Rajang, 20. Lanu, 24. Nüngjem,
25. Sūra.

LANGTSÜNGLEN :

1. Khu, 2. Süjak, 3. Onük, 4. Oba,
5. Anü, 6. Ratet, 7. Mozü, 8. Ita, 10. Tar,
12. Tinu, 14. Salem, 15. Aja, 18. Anünü,
19. Taju, 21. Ano, 22. Onü, 23. Kua.

NAI-A YA METETTER**Gottlieb Daimler-i yangluba mezüngbuba motorcycle**

Tanur asoba anogo nung salem osang den noksa angati adokdaksünura - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

1. Tenüing :
2. Tasoba anogo:
3. Küm : 4. Class :
5. School :
6. Talidak :
7. Salem osang :

Tepela Tasoba Anogo**Tinsukia nung Adivasis nungertemi longkak ait**

Tinsukia, Mongputeni/ October 8 (Agencies): State aser Centre sorkar nungi tangutsü tim temeden aser teyaritem khanga Assam nung Tinsukia kübok Hukan Pukhuri playground nung Bodhbarnü Adivasi nunger meyirejang aika adenshia longkak aitogo.

Longkak aitertemi küm aika tezü adangba aser tenangzükba mataloktsüba anema yimyim balala ayimba den placard tem amer longkak aita liasü.

Placard tem nung Adivasi aser süngolu nung aliba kintem asoshi Scheduled Tribe (ST) jenjang akhangba zülua liasü. Item ajanga parnok officially magizükba aser iba ajanga shisaluyim, employment, aser social welfare nung maongkatem magütsüba metetdaksüogo.

"Onok maitüsü, sobaliba, mapa lir, saka onok agizüka mali. Sorkari onok agizüktsü mapang tongogo," ta banner ka nung zülur liasü.

Tanga placard tem nung ali makaba kibongtem atema ali patta tangsa tang agütsütsü nüngdakba indang shia liasü.

Longkak aitertemi map aser kuli kakettertem ayipa longkak ait, koba ajanga kibongtem putu aika parnok meyong ali makai litepa aruba tuteta sayuogo.

Lenirtemi ashiba agi, ali temeden ya temezüing ozüing dak sendakba ken o ka dang masü saka kibongtem atema temetalokdak lir, shirnok parnokshia yoktsü ana nung lir aser rongsenketzüing nunga tashi meitei lir.

Longkak aitertemisa süngolu nung inyakertem nem taah tali

agütsütsü khanga ayimtena liasü. Lanurtemi parnok tang aazükba indang zülua bener longkak ait aser taah ajungkettsütsü takhangba agütsü.

"Onok süngolu nung anogoshi aser aonungshia alir, saka onok taah ya onok taküm liyonga aotsü asoshi teperi masü," ta longkak aitertem rongnung kati ayima liasü.

Taoba mapang kin o kin tsüingda mangatettep adokba aser tüzümetzüing amala lendong balala ajanga pei talidak toktsür aotsüsa akümertemia iba sentong nung shilem agia parnok nem tapet teyari agütsütsü takhangba agütsü.

"Onok akaba ajak khenbo samaogo aser onok tang tashi ochi obendang atema atadar," ta placard ka nung zülua liasü.

Rally ajangsa 2022 Adivasi peace accord benoka inyakshangshitsü nüngdakba nenshia metetdaksüogo.

Placard aika nung "Accord benoka inyakang" ta zülur liasü aser iba ajanga menoa jenjang magiba agi nüburtem tezü adangba sayur.

Maneni lenirtemi ashiba agi, parnok takhangba dak sendakba nung Central Defence Minister Rajnath Singh-i tenangzükba agütsüba dena mapa kuma minyakteti lir.

"Pai onok ashioketsüogo. Jenjang tapet agitsütsü ta onok dang nangzük, saka kecha inyaka mali," ta lenirtemi osang benertem den sensaksemba mapang ashi.

Adivasi nunger lenirtemi Northeast Now dang ashiba agi, sorkari parnok takhangba

mataloktsüba, Adivasi nungertemi 2026 küm Assam Assembly elections nung BJP sorkar melentsü atema inyaktsü.

"Onoki mapang talangka ataogo. Sorkari onok ola maneni sentoka toktsüra nüburtemi 2026 küm temelenshi bener arutsü atema pei democratic temeden amshitsü," ta lenir kati ashi.

Temetetsü kaji Assam Chief Minister Himanta Biswa Sarma-a kasa anogo Tinsukia nung oa liasü. Pa MLA aser minister tem aikati miner oa lokti senden balala amenba den party inyakymbalala nung shilem agia liasü.

Longkak aitba sentong tesunep nung agitsü atema ketdangsürtemi iba temi police aika yoka liasü.

Longkak aitba sentong ayongertem aser ketdangsürtemi iba sentong ya yimjung nung agiba metetdaksüogo.

Kaketshirtem, süngolu nung inyakertem aser local lokti tentettem ka kuma longjemer, yimyim ayima placards tem amer longkak aitogo aser iba ajanga parnok temulungtetba aser telongjem sayur.

Ken o asadangertemi ashiba agi, iba longkak aitba sentong ajanga Assam nung aliba Adivasi nungertem loktiliba aser rongsenketzüing nung sentoka toktsüba, rehabilitation menomeyangba aser parnok formally magizükba atema tezü adangba tali kuma aoba sayur.

Tinsukia rally ajanga parnok tebilemba mataloktsüra parnok yimden yimsüsüba nunga temelenshi atema inyaktsü renema aliba sayur.

Mamata -i Teesta metsüingba ya Hydel Project tem dak tai tongloktsü

Guwahati, Mongputeni/ October 8 (Agencies): West Bengal Chief Minister Mamata Banerjee-i Bodhbarnü North Bengal nung tüzümetzüing lendong tamajungba kuma aoba indang tebilemtsü lemsatep, aser iba ya kidanger Sikkim nung hydroelectric project tem tali kuma aoba ajanga lir ta shiogo.

Iba tesem semdangba mapang lai, Sikkim aser Bhutan nungi Teesta aser Sankosh ayong ajanga aluba tzu agi West Bengal nung tesem balala koda metsünger iba indang lemsatepa liasü.

Banerjee-i ashiba agi, "West Bengal indang geographical location ya rong mesüker. Nepal mesüra Sikkim nung tzu metsüingra tzu ya yimya agi Bengal-i yima alur."

Laisa, Sikkim nung hydroelectric project tem aitsüogo aser ashiba agi, tzu sadem sadema meyimdaksüi nokdanga ayuba ajanga Teesta ayong moshi ayimer aser iba ajanga state nung ayongtem dak kongshir.

"Sikkim nung hydel project

tem ajanga tzu kanga junga mayimer aser iba ajanga Teesta ayong moshia yimdaksür," ta lai rasa ashi.

Chief Minister-isa, Sikkim nung hydro-power project tem aika benoka inyakba agi tezü adangba lemsatepogo aser lendong ataloktsü akok ta meteta liaka ketdangsürtemi item project tem inyaktsü atema temelaba agütsüba ashishia liasü.

Lai ashiba agi, "hydro-power project paika atema parnok koma temelaba agütsür ni mangateter. Onoki ana inyaktsü merangdangogo, aser ajia kangabo takok mongutet," ta lai Mirik block kübok Dudhey nung anentsüh agi kongshir aliba kibongtem den sensaksemba mapang ashi.

Banerjee-i, lai Sikkim anemba kecha mali ta jangjashitsüogo, saka lai ayong nung project balala benoka inyakba mapang kümdanga inyakshangshitsü mepeshi aser ashiba agi, ayong ayimba minprongba ajanga tüzümetzüing aser anentsüh amala lendongtem ataloker.

"Ayong yima aliba

nokdangra kodaser tüzümetzüing aser anentsüh nokdangtetsü? ayong nung project aika benoka minyak tsüingda sorkari kanga junga bilemdangtsü asü," ta lai ashi.

Banerjee-isa, Sikkim aser Bhutan nungi chiokba tzu agi Bengal nung tüzümetzüing adokdaksür, ta ashi.

"Ni Centre dang Indo-Bhutan River Commission ka amenoktsü aiben mepeshia aruogo, saka tang tashi kecha telangzüba agüja mali," ta lai ashi. Arrtsü adena ayong achaayangtsü asoshi tesendaktep akangshitsü atema iba commission ya amenoktsü lai ayongzüka liasü.

Maneni Banerjee-isa, dredging, desiltation shitak maliba aser tangatetep ka makai DVC-controlled dam tem nungi tzu chiokba ajanga tüzümetzüing lendong tamajungba kümdaksür, ta ashi.

Laisa, nüburtem dang süngjema alitsü mepeshiba den tia tensa majungba mapang aria bilemtepa longjemer alitsü koda tongtibang iba indang lemsatepa liasü.

Susumu Kitagawa, Richard Robson aser Omar Yaghi nungeri Nobel Prize in Chemistry angu



NOBELPRISET I KEMI 2025
THE NOBEL PRIZE IN CHEMISTRY 2025



KUNGL.
VETENSKAPS
AKADEMIEN
THE ROYAL SWEDISH ACADEMY OF SCIENCES



Susumu Kitagawa
Kyoto University
Japan



Richard Robson
University of Melbourne
Australia



Omar M. Yaghi
University of California, Berkeley
USA

Stockholm, Mongputeni/Oct. 08 (Agencies): Susumu Kitagawa, Richard Robson aser Omar M. Yaghi nunger nem 2025 Novel Prize in Chemistry agütsüogo, shirnoki 'gas storage, catalysis aser environmental application' nung amshitettsüsa metal-organic frameworks (MOFs) yangluteta liasü.

Iba sempet sangdonga Royal Swedish Academy of Sciences ajanga social media X nung scientists asem yagi metal-organic framework yanglutetba asoshi iba sempet agütsür ta ashi. Par asem ya senpet sen 11 million Swedish crowns (India nunger sen10 crore shi) den alimai meteta Nobel angutsü.

MOFs ya crystalline compounds lir aser iba ya organic molecules sendaktepba ajanga yangluba metal ions lir,

koba ajanga 'porous structure' adokdaksür. Item frameworks nungya hydrogen mesüra carbon dioxide ama gases rizünga yuteter, menena aliba mürekteter aser energy aser materials sciens nung frontiers tasen lapoktsür.

Susumu Kitagawa ya Japan nunger chemist aser Kyoto University nungi hydrocarbon chemistry nung PhD ka ngua lir, aser synthesis aser characterization of MOFs nunga mezüngpur lir. Kitagawa ya tang Kyoto University nung professor inyaker aser tamalena coordination chemistry nung shilem tajung agiba mechi Humboldt Research Prize (2008) aser De Gennes Prize ngua lir.

Richard Robson ya UK nungi aser University of Oxford nung chemistry azüngba sülen Australia-i ao,

kong pa tangya University of Melbourne nung tesayur inyaker. Pai tamalen research agiba ajanga metal-organic coordination polymers yanglutsü asoshi tenzükja tatsüka lir MOFs akum.

Omar M. Yaghi ya Amman, Jordan nung aso aser University of Illinois Urbana-Champaign nungi PhD renemer tang University of California, Berkeley nung tesayur inyaker. Omar M. Yaghi-i metal-organic frameworks nüngja agütsü.

Nobel Committee ajanga parnok mapa ya temelenshi tulu aliba lir ta ashir aser MOFs ya modern chemistry nung tekeratiba ainba areas kumogo.

Tang tashinung Medicine aser Physics takok angurtem sangdongogo aser ano Literature, Peace aser Economics indang ano mesangdongi lir.

Pakistan nung TTP telok den khatepdang sepai 11 asü



Islamabad, Mongputeni/Oct. 08 (Agencies): Khyber Pakhtunkhwa nung Orakzai district nung Tehrik-e-Taliban Pakistan (TTP) fighters den khatepba mapang Lieutenant Colonel ka aser Major ka densema Pakistan indang security forces züngsem 11 takum sama.

Tribal belt nung TTP lir ta osang aruba sülen itdangiterba nung ajemdaker operation ya October 7-8 aonung tenzük. Iba operation mapang Pakistan sepaitemi TTP züngsem 19 tepset.

Linük asoshi takum bendanga agütsür sepai tanishir tem ya Rawalpindi nungi arishi küm 39 tain Lt Col Junaid Arif, shibai iba

operation yakbang süa anir liasü aser Rawalpindi nungi arishi küm 33 tain Major Tayyab Rahat alitsü, shiba second-in-command liasü.

Kasa lendong nung asüba sepaitem ya Naib Subedar Azam Gul (38, Khyber), Naik Adil Hussain (35, Kurram), Naik Gul Ameer (34, Tank), Lance Naik Sher Khan (31, Mardan), Lance Naik Talish Faraz (32, Mansehra), Lance Naik Irshad Hussain (32, Kurram), Sepoy Tufail Khan (28, Malakand), Sepoy Aqib Ali (23, Swabi), aser Sepoy Muhammad Zahid (24, Tank) alitsü.

Mitkar osangtem ajanga asür nem akhum agütsü aser parnoki tasü ita raraba asoshi

tenünsang agüja liasü. "Kiralongrar tebilemtsü nungi linük kumzüka ayutsü merangba mapang tasü tait linük jabasotem takum bendanga agütsü," ta ashi.

Pakistani armed forces temi linük nungi kiralongrar samatsütsü asoshi tali nendaka inyaksü akangshia renem aser iba ama takum tenlaba amajok nung meyutsütsü ta ashi.

Iba tesem ya tangbo sepaitemi lungbanger telungpur kar danga anünga ali asü mesüra teyariri ali asü ta bushiba mapang lir. TTP ya Pakistan nung nokdanga aliba telok ka lir aser parnoki Khyber Pakhtunkhwa nung security personnel dak tenük yoker amakba tali kumogo.

DECLARATION

Regd. No. 3728/2025

I, S. A. Anungla, Adult, D/o Shri Sowalemba, Serving as ANM under Chief Medical Officer, Mokokchung: Nagaland, do hereby solemnly declare and state on oath as under:

1. That my official name is S. A. Anungla.
2. That my name S. A. Anungla is recorded in my Aadhaar Card, Pan Card and other official documents, whereas in my appointment order vide No DHA-4/ANM/GFN/91-92/952-99, dated Kohima the 19th April 1991 my name is inadvertently recorded as Anungla S Ao as a result there is contradiction.
3. That the name S. A. Anungla & Anungla S Ao refers to the same and one person only.
4. Henceforth, my name shall be read and corrected as S. A. Anungla for all official and future correspondence.
5. That the above statements made in para 1-4 are true to the best of my knowledge and nothing materials has been concealed herein and I signed this affidavit before the Competent Authority on 7th day of October 2025.

Sd/-
S. A. Anungla
(DECLARANT)

Solemnly affirmed and declare before me by the declarant on this 7th day of October 2025 at Mokokchung: Nagaland.

N.K. Assumi
Notary Public Nagaland

Myanmar Buddhist benjongnung nisung 24 pokset



Chaung U, Mongputeni/Oct. 08 (Agencies): Myanmar mitkar sorkar anema longkak aitba mapang army motorized paraglider nungi bomb ana tsükdaktsüba nung nisung 24 asü aser 47 yiru, ta government-in-exile indang odongtari ashi.

Myanmar tiyonglen national holiday ka atema nisung 100 shi Chaung U jila nung adenshia alidang mitkari Hombarn nikongdang amak.

2021 küm mitkar temi tashiyim amshia sorkar atsüngdokba sülen Myanmar nung nisung meyrirjang aika süogo aser million aika pei ki yutsür tesem balala nung jenoka lir, koba ajanga armed resistance telok tem aser ethnic militias den civil war adokdaksü.

Linük tesadang ka dak tema maziükteti akumba sülen army temi tang takok kanga angur, ajisüaka tayimtsü amshia amakba aser bomb kanga sashia pokloktsüba ajanga lir.

Hombarnü amakba ama taküm Myanmar armed forces temi tayimtsü amshia noklang aiben maka lir.

Mitkari kumtetba sorkari tang par air force tashi itshia China nungi drones tasen alizükogo, koba ajanga mitkar tem yarir, aser Russia nungi technical teyari agütsür.

Iba den Beijing-i Myanmar den par arütsü tsütsü telungpur tem dang opposition telok tem nem nok-nü agütsüba anentsü ashir, anungji mitkar jenjang tajungba akumer aser telungpur temi tesüiba küm ana tsüngta agia aliba litsü-lika aika meyipa agütsütsüsa akum.

Hombarnü amakba ya Sagaing region nung jila ka nung tenük yoker amakba lir, kong Thadingyut nung candlelight vigil agitsü asoshi adenshia liasü.

Ibai mitkar nung tashiyim amshia züngsemdaktsüba aser aruyaa aliba national election anema yimjung nung longkak aittsü ayongzükbä liasü.

Parnokisa Aung San Suu Kyi densema yimten yimsüsürtem tepuokdak alirtem chioktsü akhanger, shiba democracy yimya nung shim saka mitkar temi tashiyim amshia atsüngdoker tepuokdak ayu.

Iba rara nung Sagaing region ya tongtipang battleground ka amai arur, kong shilem tuluka volunteer militias kübok lir.

Item telok dang People's Defence Force (PDF) ta ajar, aser parnoka local administration lir. Hombarnü lokti adenshiba nung anünglen nungi amaktsü akok ta osang ka arua liasü, ta PDF nung ketdangsür kati ashi.

Parnoki longkak aitba kanga kera tembangtsü merang, saka paramotors (paragliders) tem imlaba dang tama iba tesem tonga aru, ta pai ashi.

Item ajak ya minute tenet nung atalok. Bomb apokba ajanga kü tetsünga yiru saka ni anasa nisung kar asü, ta pai ashi.

Amnesty International ajanga Mongulbarnü sangdong ka nung, mitkar temi motorised paragliders amshia nüburtem dak amakba ya yimya ka kumogo ta ashi.

Aircraft aser helicopters aser jet fuel peria maliba ajanga mitkar temi paramotors ya tali amshir ta ashir.

Tesüiba küm ishika international sanctions aliba mechi Myanmar yimsüsür temi mitkar atema hadir alitsü tasakba kumdaktsür, ajisüaka China aser Russia ama linük nungi technology agütsüba ajanga tensa melenshir.

Myanmar nung general elections ya December nung agitsü lir, koba 2021 küm mitkari tashiyim amshia sorkar atsüngdokba sülen vote mezüngbuba alitsü.

Ajisüaka opposition party aika anentsüogo aser voting ya mitkar kübok aliba linük tesadang ka nung dang agitsü amai lir.

4 buba Mkg town inter-ward volleyball tournament tenzükogo



MMC Chairman
Imkongchubai 4 buba
Mokokchung Town Inter
ward volleyball
tournament tenzükja
mezung asayatsüpur
den salemyonga
aodang tangokba noksa
nung angur.

Mokokchung, Mongputeni/October 8 (TYO): Mokokchung Municipal Council Chairman, Imkongchubai-i 4 buba Mokokchung town inter-ward volleyball tournament 2025 yangi Multi-purpose Sports Complex, Mokokchung nung meraketa tenzüksüogo. Iba asayamung ya "forging champions" omen dak rangloker

Mokokchung District Volleyball Association aküm nung Kumlong Sporting Association-i Mokokchung nung volleyball jangrartem ajungshitsü nükla yur kümshi ayongzüka akar.

Iba asayamung nung taküm ward 5 - Kichutip, Kumlong, Penli, Mongsenbai aser Artang ward-temi shilem agidar. Iba asayamung mezügbubaji

Sungkomen Ward-i aben, tanabubaji Kumlong Ward aser tasembubajia Sungkomen Ward-isa bena lir. Saka takümbo Sungkomen ward pur shilem magiteter.

Taküm iba asayamung shir ward-i bendir champion nem trophy den senpet sen 50,000/- (fifty thousand) aser tatong (runner-up) nem 30,000/-

agütsüsü. Iba den ano nija senpet best spiker, best setter aser player of the tournament shima senpettsüsü renema lir, ta tayongertemi metetdaksüogo.

Iba asayamung ya asüng October 9 nü tembangtsü aser senpet agütsüba sentong nung Er. Chutsusie Thowachu, EE, Electrical Division, Mokokchung tetushi tesemdang asütsü jaoka lir.

Mokokchung nung saisabong meimertem anitettsü asoshi Kümlong Sporting Association-i taküm agi küm pezübuba iba asayamung ayongba asoshi pelaba den iba asayamung ya talangka renloka aotsü aser saisabong meimertemi shilem tajung agitsü imlar, ta MMC Chairman, Imkongchubai-i asayamung lapoktsüba sentong nung jembidang metetdaksü.

Saisabong ya asayaba ka dangbo masü. Ibai tesayur ka, tanüdagtsü ka aser lenmang ka mesüka lir. Asenok ground/court-i aiba ya akoktsü atema dangbo masü, asenokji shiba'r court nung sayur. Chichiba

saisabonger ka asütsü asoshi asayar ka dak tazüokba, metitemi merangba, ajemaluba aser akümtsübu jaklatem amangtsü nüngdaker. Takok aser tamakokji saisabong nung shilem ka lir, saka takok/tamakok ajurudang nai jakla koma benshir iba jagi ne jaklaji sayur, ta pai ashi.

Takok anguba tapu ana lir; "kaji nai/ner teloki tangar akokba (win) aser tanabubaji nai ne sasa akokba (accomplishment) - ne azümesen, arendakba, tatemtsü bushiba (excuses) itemji koktetba dang ashir. Nai saisabong/asaya dang akoktsü merangra, ne tepelaji yangji dang tematoktsü, saka nai na akoktsü merangra aser anogoshi na tajungba akümtsü merangra, na temaba jenjangi ajungkettsü aser aji chichiba takokji lir, anungji, pei sasa pei jakla koktettsü merangtsüla", ta paisa ayongzü.

Asayamung tenzükja mezüng asaya Kichutip Ward o Penli Ward na asayaba Kichutip-i 25/10 aser 25/17 agi koka liasü.

CEAT Cricket Awards nung Rohit, Lara, Root nunger tushi

Mongputeni/October 8, 2025 (Agencies): Mumbai nung Mongolbarnü 27buba CEAT Cricket Rating (CCR) Awards sentong agiogo. Iba sentong nung alima nung nüngtugu cricket asayartem aser lanur asayartem tushia liasü.

Veterans Rohit Sharma aser Brian Lara nunger den lanur asayar Angkrish Raghuvanshi nunger iba sentong nung tushio.

2024 T20 World Cup aser taküm Champions Trophy takok dangi aniba atema taoba India captain Rohit Sharma nem tetushi agüja liasü. Iba naroküm ya pai Sunil Gavaskar ket nungi agizüka liasü.

West Indies nunger taoba mapang nüngtugu asayar Brian Lara nem Lifetime Achievement Award agütsü aser India nunger spin legend Bhagwath Chandrasekhar nema Lifetime Achievement of the Year naroküm agüja liasü.

Kasa mapang nung England nunger asayar Joe Root nem

Men's International Cricketer of the Year award agütsü aser pa teammate Harry Brook nem Men's Test Batter of the Year naroküm agüja liasü. Sri Lanka nunger left-arm spinner Prabath Jayasuriya nem Men's Test Bowler of the Year award agütsü.

Maneni Sanju Samson nem Men's T20I Batter of the Year naroküm aser Varun Chakravarthy nem T20I Bowler of the Year naroküm agütsü. Lanur asayar Angkrish Raghuvanshi nem Emerging Player of the Year naroküm aser Harsh Dubey nem Domestic Cricketer of the Year naroküm agütsü. Pai Ranji trophy kanga junga asayaogo.

Tetsürtem rongnung Smriti Mandhana aser Deepti Sharma na nem Women's Batter aser Bowler of the Year naroküm agütsü.

CEAT Cricket Rating Award angurtem:

Special memento for winning Champions Trophy: Rohit Sharma

Lifetime achievement award: Brian Lara

International cricketer of the year: Joe Root

T20I batter of the year: Sanju Samson

T20I bowler of the year: Varun Chakravarthy

CEAT JioStar Award: Shreyas Iyer

Men's ODI Batter of the Year: Kane Williamson

Men's ODI Bowler of the Year: Matt Henry

CEAT Lifetime Achievement Award: B.S. Chandrasekhar

Women's Batter Of The Year: Smriti Mandhana

Women's Bowler Of The Year: Deepti Sharma

The Emerging Player of the Year: Angrish Raghuvanshi

Award for Exemplary Leadership: Temba Bavuma

Men's Test Bowler of the Year: Prabath Jayasuriya

Men's Test Cricketer of the Year: Harry Brook

CEAT Domestic Cricketer of the Year: Harsh Dubey.



Mokokchung, October 8, 2025 : Mokokchung District Football Association(MDFA)-i taruba 2026 küm 25 buba Dr. T. Ao Nagaland inter-district football championship ayonga lir, aser iba dak sentakba nung Ao senden den mensem akaba mapang tangokba noksa nung angur. Iba mensem nung Ao Senden-i temoatsü agüja iba asayamung takok angütsü asoshi maparen ajak nung yariteptsü mulunga MDFA ketdangsürtem ajungshia liasü.

NSF MM TROPHY: Mao SU aser Nagaland United SC na QF-i iogo

Kohima, Mongputeni/October 8 (TYO): Bodhbarnü NSF Martyrs Memorial Trophy nung Mao Students Union aser Nagaland United Sports Club nati pei tata asaya kokogo quarter final tongogo. Iba asayamung ya Indira Gandhi Stadium Kohima nung asayadar.

Oct 8 nü mezügbuba asaya nung Mao SU-i taoba champion New Market FC goal 3-2 agi kokogo.

Asaya nung New Market FC atema Letkokia Kuki aser Haoneo Kuki nati minute 17 aser 38buba nung goal kaka idaktsü.

Ajisüaka asaya mezügbuba shilem atemtsü lia Mao SU atema Lohrü Kaisü-i goal ka idaktsü aser paisa minute 87buba nung tanabuba goal idakja goal kasasa aküm. Iba sülen asaya atemtsü lia minute 90buba nung W.John-i Mao SU atema tasembuba goal idakja parnoki asaya koka liasü.

Iba asaya atema John nem player of the match naroküm agütsü. Iba naroküm ya match patron, Kohima Municipal

Council mendenbuba Neikhozo Suokhrie-i agüja liasü.

Maneni pre-quarter finals 6buba nung Nagaland United-i goal 7 agi Dimapur Chaos kokogo.

Asaya nung Yhoyo Lohe-i minute 8buba nung mezügbuba goal idaktsü aser Arap Konyak-i minute 15buba nung tanabuba goal idaktsü. Iba sülen ano Sanathoi Meitei-i minute 17buba nung tasembuba goal idaktsür asaya mezügbuba shilem tembang.

Asaya tanabuba shilem nung ano Joel Haokip, Jenish Singh, Manton aser Ghuqje Chishi nungeria goal kaka idakja liasü.

Asaya atema NUSC nungi Joel Haokip nem match patron Wabanginba M, Executive Engineer, South Division PWD, Nagaland-i player of the match naroküm agüja liasü.

Tanü asaya akokba team ana ya October 13 nü quarter final asayatsü.

October 9 nü asaya:

1. Delhi police vs Kuki United FC @12
2. Nagaland police vs Anal Lenruwl Tangpi @ 2.

BILEMDANGANG

"Nai metetbaji tetibo tejembi, saka teti nai kechi jembir ibaji metettsü merangang."